

Schwarz-Schilling: Sporazum o restrukturiranju policije na dohvat ruke

Sporazum o restrukturiranju policije, koji poštuje želje građana Bosne i Hercegovine i ispunjava tri principa Evropske komisije, na dohvat je ruke, napisao je visoki predstavnik i specijalni predstavnik Evropske unije Christian Schwarz-Schilling u svojoj sedmičnoj kolumni u novinama.

“Direkcija za reformu policije upravo završava svoj izvještaj,” napisao je visoki predstavnik i specijalni predstavnik EU u članku koji je danas objavljen u *Dnevnom avazu*, *Nezavisnim novinama* i *Večernjem listu*. “Sada je vrijeme da strane traže rješenja za reformu policije koja će biti u skladu sa tri principa Evropske komisije i omogućiti Direkciji da izradi prijedlog za implementaciju policijske reforme oko kojeg će biti postignut čvrst politički konsenzus.”

“Ovo je jedinstvena prilika za novoizabrane lidere Bosne i Hercegovine da osiguraju budućnost svoje zemlje u Evropi.”

Christian Schwarz-Schilling je objasnio da je Evropska komisija otpočela pregovore oko Sporazuma o stabilizaciji i pridruživanju (SSP) tek nakon što su se parlamenti Republike Srpske, Federacije i Bosne i Hercegovine dogovorili da krenu dalje u reformi policije.

“Danas Evropska unija očekuje od Direkcije za reformu policije da donese Plan za reformu policije prije kraja godine,” napisao je visoki predstavnik i specijalni predstavnik EU, “te takođe očekuje od Vlada i Parlamenata Republike Srpske, Federacije BiH i Bosne i Hercegovine da najkasnije do marta 2007. godine usvoje plan za provođenje reforme policije.”

Christian Schwarz-Schilling je pozdravio sve prijedloge u vezi sa budžetom policije, ali je odbacio potrebu za sveobuhvatnom fiskalnom reformom. "Najbolje rješenje za financiranje nove policijske strukture je mehanizam koji se već primjenjuje za financiranje rada SIPA-e i Državne granične službe, odnosno redovni državni budžetski sistem.," napisao je.

"Policajci širom Bosne i Hercegovine će tako znati da primaju istu platu za isti posao i da imaju iste beneficije i finansijsku podršku bez obzira gdje rade."

Visoki predstavnik i specijalni predstavnik EU je objasnio da Evropska unija želi reformu policije jer joj je potreban jedan sugovornik sa zakonodavnim vlastima koji će se baviti mnogim pitanjima – i implementirati ih – u sferi pravde i unutrašnjih poslova, a koja su potrebna u procesu pristupanja.

Osim toga, evropske i međunarodne policijske snage žele jedinstvenog sugovornika sa kojim će razgovarati o operativnim pitanjima. A Bosni i Hercegovini treba reforma policije da bi se borila protiv organiziranog kriminala, ilegalne imigracije i međunarodnog terorizma, napisao je Christian Schwarz-Schilling.

"Međutim, ukoliko dogovor o policijskoj reformi ne bude postignut," zaključio je visoki predstavnik i specijalni predstavnik EU, "onaj ko bude blokirao dogovor biće odgovoran za odlaganje zaključivanja Sporazuma o stabilizaciji i pridruživanju i uskraćivanje privilegija koje za bh. građane osigurava integracija u EU, kao što su bezvizni režim, ekonomska i tehnička pomoć, pristup tržištu, putem kojih se stvara odgovarajuća klima za privlačenje većeg broja međunarodnih investicija za otvaranje novih radnih mjesta i osigurava razvijanje boljeg obrazovnog sistema i sistema zdravstvene zaštite."

Cjelokupan tekst sedmične kolumne visokog predstavnika/specijalnog predstavnika EU možete naći na:

www.ohr.int